



Scolaras e scolars da Savognin e Scuol han purtà la valisch plain ideas rumantschas a Berna.

FOTOS ADRIAN CAMARTIN/RTR

# Emna rumantscha vul promover l'identitad multifara

«Rumantsch: In ferm toc Svizra, ma er in ferm toc mund.» Quai è il motto da l'Emna rumantscha ch'il Departament federal per fatgs da l'exteriur (DFAE) organischa en collavuraziun cun il chantun e cun la Lia Rumantscha.

RTR/FMR

L'onn passà a chaschun da l'emprima Emna rumantscha aveva ina delegaziun da Glion frequentà l'emna en Chasa federala a Berna. Quest onn èn quai 12 scolaras e scolars da Scuol e Savognin. Per il cumenzament da l'emna han els deponì en Chasa federala ina valisch plain ideas per promover il rumantsch. Las scolaras ed ils scolars han preschentà lur ideas al president da la Confederaziun, cusseglier federal *Ignazio Cassis* ed al schef dal Departament chantunal d'educaziun, cultura e protecziun da l'ambient, *Jon Domenic Parolini*. Sco quai che Ignazio Cassis ha ditg, sajan la coesiu e la passiu per la diver-

sidad fermezzas da la Svizra. «Sin questas fermezzas sto la Svizra sa concentrar per dumagnar sias sfidas.» Las scolaras ed ils scolars da Savognin e da Scuol mussian che nosa diversitad mainia ad ideas innovativas che distinguian la Svizra er a l'exteriur, ha Cassis ditg.

## Eveniments ed occurrenz digitalas en l'exteriur

Tenor il president da la Confederaziun, Ignazio Cassis, è la diversitad ina ritgezza per noss pajais. Quella occurrenza annuala lubeschia da promover nosa identitad multifara. Sper las activitads a Berna, organischan las represchentanzas svizas en l'exteriur er quest onn puspè diversas

occurrenz per render pli enconuscenta la lingua e la cultura rumantscha en lur pajais. Pervi da las mesiras en connex cun la pandemia però vegn quai fatg per gronda part en furma d'eveniments e cuntegns digitalas. La promoziun da las linguas minoritaras en Svizra fa ultra da quai part dal dialog politic structurà e cuntinuà ch'il schef dal DFAE maina cun ils chantuns Grischun e Tessin. En il rom da quest barat è tranter auter er naschì il program «Piccolo Erasmus» che permetta al personal da l'administraziun federala da lavurar en ina da las duas administraziuns chantunalas e viceversa. Ellas ed els pon uschia prender ina invista persunala e professunala da la diversitad da la Svizra.



Guardan cun grond interess – ils magistrats Ignazio Cassis e Jon Domenic Parolini.



Ultim sguard en la valisch avant l'inscunter.



Trais, dus, in – partenza!



Insaquantas da las propostas da las scolaras e dals scolars da Savognin e da Scuol.